

## A Dak in Moanever.

Es woar 'n Sunntg vern Weissenberger Märchte. Ich hoatte mich 'n Eimeetg<sup>1)</sup> a Bössl uffs linke Uhr gehau'n un wullte an Nickerch machen, ader de Flieg'n stoachen mich ludermaßg. Do zoit mich woas oan Beene und soit: „Harrmoann, giebst de murg'n mett ins Moanever, se wulln 'n Wachtbarg einnahm'n.“

Es woar Robbersch<sup>2)</sup> Heinrech. Ich rieb mer de Dg'n aus, gahnte un soit, wiech mersch iberläht hotte: mer macht'n sahn, doas mer murg'n s Klihei<sup>3)</sup> wegfricht'n.

„Nu,“ mehnte Heinrech, „doas aß se Feusch, doas hoppt der ne dervun.“

„Nu,“ soit 'ch, „doas nu gerade, adersch Wader wärd ömschloin,<sup>4)</sup> de Steene schwiß'n.“

„Wenn de ne willst, läßt's bleibn, gebaddelt<sup>5)</sup> wärsch de ne, iberläh dersch,“ goab mer Heinrech druff un ging.

Menne Frau beeß<sup>6)</sup> un soit, de ganze vurge Wuche wärsch römgelesn, andre Voite wärn lange fertg met dar Darbeit, doas Sei läge schun ib'g,<sup>7)</sup> oabs denn no amol noaß war'n silte? Es ging mer ader doa in Koppe röm, un wies'n andern Murg'n schiene woar, steckt 'ch mer a poar Schniet'n<sup>8)</sup> unds Quetschflaschl ein, un wiech Heinerchen giehn soaf, fuhr 'ch zor Hingerthiere raus, un furtgings öm Ruthsteen<sup>9)</sup> röm. Uf dallen Wajgen liefen Voite raus, as wenn se woas versoint hätten.

Mer woaren noa ne bis in de Kerschallee, do hiert'n mer se schun schiffen. Wie mer ader uf de Hiehe koamen, du meine Bitte: Himmel un Suldoaten! Do koamen se vun Bischdorf rausgewälzt eemmer uf Neberkamniß lus, un vun Weiten, uf de Buschschänke zu, da soaken mer de Gaffalerie flieg'n.

A Hoase koam gelosen, hoste ne gesoahn. „Halt'n uf, halt'n uf!“ schrieg'n de Voite. Ich soit: „Ne, löst'n lösen, doas eß anne Ordenanz, dar trät anne Staffette noa Preiß'n.“ Do lacht'n se, un nu mehnt 'ch: „Nu wummer uns zun Koanonen halen, ihr wärd's sahn, de gewinnen.“

<sup>1)</sup> Die Stunde zwischen 12 und 1 Uhr. <sup>2)</sup> Nachbars. <sup>3)</sup> Kleeheu. <sup>4)</sup> umschlagen. <sup>5)</sup> gebeten <sup>6)</sup> biß, gebräuchlich für „schelten“. <sup>7)</sup> ewig. <sup>8)</sup> Schnitten. <sup>9)</sup> Rotstein, ein Lausitzer Berg. <sup>10)</sup> Wegen.